

## Atu ah hin Pathian sin in zeidah kan i ruahchan khawh?

**Thlaraulei Biatak 1: Pathian duhnak le thil tining kan hngal dihkho lo...**



*Emmaus khua lei kalnak lam ah Jesuh nih zultu pahnih a ton hna lio—Charters Cathedral, France*

Pathian hi khoika ah dah a um hnga? Ziah dah harnak kan ton lio ah hin a daih ko hnga? Kan ca ah rian a ÷uan taktak ko hnga maw? Hi bantu biahalnak na ngeih mi nih atu lio vawleipi nih a ton mi harnak kong ah siaherhnak na ngeih a langhter. Pathian cu na zumh i harnak caan ah a ka bawmh lai tiah na ruahchan. Asinain, atu ah na ruah bang in Pathian bawmhnak le umpinak na tem lo. Lungre thei le thinphang thlalau in na um. Phun dang in chim ahcun, Pathian bawmhnak le umpinak tam deuh in hmuh le tem na duh lio caan a si.

A tang i capar tawite hi “Atu ah hin Pathian sin in zeidah kan i ruahchan khawh?” ti mi tlangtar in ka ÷ial lio mi capar 7 lak i a pakhatnak a si. Hi capar hna hi Bible ah hram a sih mi an si i, Pathian a hngal i a daw mi hna, a rian a ÷uan i caanhar chung zong ah amah i bochan khawhnak lam a kawl mi hna ca ah thlarau biatak an si.

**Thlaraulei Biatak 1: Pathian duhnak le thil tining na hngalh dih khawh lo kha hngal than law, a'n pek mi poh cohlan thiam i zuam.** (Isaiah 55:1-9; Luka 24:13-22)

Pathian sin in kan i ruahchan mi thil hna hi tha tein zoh than tik ah, kanmah ruahning le duhning in rianñuan ter kan duhnak a lang. Phun dang in chim ahcun, amah duh mi si lo in kanmah duh mi deuh hi Pathian nih tuah piak ding in kan i ruahchan. Cu ti kan i ruahchan bantuk in rian a ñuan lo tik ah zeidah a cang? Mi cheukhat cu kan lung a buai, kan thin a phang, kan ngaih a chia, asiloah Pathian cung ah kan thin a hung. Cu kong ah aho dah a palh? Pathian maw a palh? Kanmah ruahchannak dah a palh?

Bible ñialtu hna nih atu le atu an kan chimh mi cu, kan i ruahchan bantuk in Pathian nih thil a tuah lo tik ah lau lo ding hi a si. Pathian ruahnak cu kan hngal in kan fiang dih kho lo. Zeimawcaan ah cun, thil pakhat khat a tuah tik ah a duhnak kan hngalh khawh tawn ko. Asinain, cu hmanh cu thil a can hnu caan zeimawzat hnu i a theipar kan hmuh hnu lawng ah kan hngalh khawh mi a si.

**Hngalh kan herh mi**

Profet Isaiah hmang in Pathian nih Israelmi hna kha, a ruahning le a thilti ning cu minung ruahning le thilti ning he aa dan zia a chimh hna:

“Ka ruahning cu nan ruahning a si lo,  
ka thil tining zong nan thil tining he an i khat lo.  
Van khi vawlei nakin a let tampi in a san deuh bang in,  
ka ruahning le ka thil tining zong nan ruahning le nan thil tining nakin,  
a let tampi in a sang deuh,” tiah BAWIPA nih a ti.  
(Isaiah 55:8-9)

Profet Isaiah nih hi hi a chim duh mi a si: Pathian nih a tuah mi (asiloah a tuah lo mi) hngalhhar thil pawl hngalh dih kan i zuam len mi hi kan ngol awk a si. Cu bantuk hngalh khawh lo ding thil hngalh i zuam len nak in, kan hngalh khawh i kan ca ah a ñahnem deuh ding mi thil tu kha kan ruah deuh awk a si. Profet Isaiah hi, Israel mi hna nih an herh taktak mi thlaraulei thil tu Pathian nih pek a duh hna nak kong a chim lio a si. Pathian duhnak le thil tining cu nan hngal dih kho lai lo, asinain nan hmuh khawh mi a dawtnak, a vel le a zaangfahnak kong tepawl tu kha nan ruah deuh ahcun, nan ca ah ñathnemnak a um deuh lai, ti kha a chimh duh mi hna cu a si. An sualnak i ngaichih in an herh mi thlaraulei thil le an ñaamhal mi taktak ca tu ah Pathian an fuhanh khawhna kha hi ti hin a tial:

“Ti a halmi poh ra tuah u,  
hika ah hin ti a um;  
Tangka zehmanh a ngei lo mi hna ra tuah u,  
rawl kha i cawk u law ei tuah u;  
Ra u law mitsur zu le cawnuk kha i cawk hna u—  
a man zehmanh pek a hau lai lo;  
Zeicahdah rawl a si ñung lo mi ah nan phaisa kha nan hloh?  
Zicahdah nan nihlawh man vialte cu nan hman dih tung i,  
rawlñam in nan um ñiamñiam tung?  
Ka bia ngai u law ka chim mi kha tuah tuah u,  
rawl vialte lak ah a thaw bik kha nan ei lai.

Ka mi hna, ka bia ngai u law ka sin ah ra tuah u;  
ka sin ah ra u law nunnak nan hmuh lai.  
A hmun mi biakamnak kha nanmah he ka ser lai i,  
David ka kamh mi thluachuahnak kha kan pek hna lai,”  
tiah BAWIPA nih a ti.  
(Isaiah 55:1-3)

Caanhar chung i kan um lio ah hin, kan thinphannak le bawmhna kan duh tuknak nih kan pawngte ah a um mi thil tha hmuh kho lo in a kan tuah khawh. Asinain, kan hngalh khawh lo le kan co khawh lo thil hngalh le co kan i zuam chung poh cu, lungbuainak le i lungsilonak nih kan nun a temtawn ko lai. Asinain, kan hngalh khawh lo mi kong ruah kha ngol in kan hngalh khawh mi kong deuh tu kan ruah ahcun, kan chung ah hngangamnak le daihnak a um deuh hrimhrim ko lai. Lungdaih-hnangamnak a um tik ah, harnak ton ding ah lungthin lei timhtuahnak tha kan ngei kho deuh lai i, kan chung ah le kanmah hmang in Pathian nih rian a tuanning cu fiang deuh in kan hmuh khawh ko lai.

### **Kan mit fimter ding ah Jesuh kan herh**

Biakam Thar ah Jesuh nih Emmaus khua lei kalnak lam ah zultu pahnih a ton hna nak kong kan hmuh. Zultu pahnih hna nih an hngalh mi cu hi hi a si: Hmailei ca ruahchannak an rak ngeih mi vialte kha atu cu a lo dih cang. Ruah lo pi in ni tlawmpal chung ah an ruahchannak cu a rawk dih cikcek. An Bawipa Jesuh cu vailam ah an thah cang; a thi i thlan ah an vui cang. An hmailei kong ah a fiang mi zehmanh a um ti lo i an chung ah himnak le daihnak a um ti lo. Sihmanhsehlaw, cu bantuk caanhar chung ah Pathian cu rian a tuan ko rih; nain cu cu zultu hna nih an hmu kho lo. Jesuh cu a rak tho than cang. A thihnak le a thawthannak thawng in Pathian nih vawlei ah khamhnak le ruahchannak a ratpi cang. A taktak ah cun, zultu pahnih hna kha ngaihchiatnak le lungrawhnak nih a nenh tuk hna ruang ah bia a ruahtu hna Jesuh a si hmanh an hngalh lo kha a si. Jesuh nih an i ceih mi kong a hal hna ah khan, “hmaichia ngai in an dir” (Luka 24:17).





Atu bantuk caanhar le zehmanh a fiang ngaingai kho ti lo mi caan ah hin, *nunnak lamthluan cung ah* hmaichia ngai in dir i zeizong vialte a sung dih cang bantuk in kan um sual lo ding a biapi ngaingai. Na ton mi thil pawl na ca ah sullam an ngeih lo i cu chung ah Pathian zong rian a ÷uan lo mi na lawh ter tik ah, profet Isaiah nih a kan chimh mi hngalh than a herh: Pathian duhnak le thil tining cu minung nih hngalh dih khawh a si lo. Pathian duhnak le thil tining hi *hngalh* khawh cu chim lo, *ruah* khawh hmanh a si tawn lo.

COVID-19 hi Pathian nih a chuahter, ka ti duhnak a si lo. Zei poh hi a tha lei an panh dih zau ko lai, ka ti duhnak zong a si lo. Asinain, kan ton mi nih profet Isaiah chim mi bia hi a thar in a ka hngalh ter than ko. Pathian ruahning le thil tining cu kanmah ruahning le thil tining bantuk a si lo. Bible ÷ialtu hna nih atu le atu an kan chimh mi cu: harnak nih a kan den i ruahchannak zong kan ngeih khawh ti lo caan zong ah, Pathian cu ÷hatlonak, sunghralhnak, rawhralhnak le fahnak chung in thil ÷ha chuahpi awk ah rian a ÷uan zungzal ko ti hi a si. Emmaus khua lei kalnak lam i hmaichia ngai in a dir i Jesuh Khrih an hmaika a dir hmanh a hmu kho ti lo mi zultu pahnih hna tuanbia nih a kan hngalh ter ÷han mi cu, kan mit fimter ding ah Jesuh kan herhnak hi a si. Zultu pahnih hna zong kha Jesuh an sin a kalnak thawng in an mit a hung fim tik ah, hmaichia ngai in dir lan lo in an tho i Jerusalem ah an kir than. Kanmah lei rian cu caanhar chung ah Khrih Jesuh kawl ve hi a si i, kan tonnak a hmun le a ning cu kan i ruahchan mi hmun le ning in a si theng lo kho.

### **Biatlangkawm**

Zei a si hmanh ah kan herhnak le kan siaherh mi poh ca ah thla kan cam awk a si ko. Kan thlacamnak hmanh in Pathian nih midang ca ah damnak maw, luatnak maw, bawmhnak maw, asiloah an herh mi thil pakhat khat a pek khawh ko hna. Asinain, kan i ruahchan bantuk in kan thlacamnak a tlin lo tik ah, thachia in kan um awk a si lo. Thlacamnak in Pathian fuhpanh zong kan ngol hlei awk a si lo. Kanmah te in kan hmuh khawh lo mi kan hmuh khawh nakhnga kan mit fimtertu ding ah Jesuh Khrih sawm hna usih law, atu lio caanhar chung ah hin kan zumhnak a ÷hawn khawh nakhnga le thil ÷ha ca ah santlai kan si khawh nakhnga Thiang Thlarau bawmh hal hna usih. Cun, ze i zong ah, a kan pek mi kha cohlan khawh i zuam ko hna usih. Kan sualnak i ngaichih usih law, Pathian nih a kan duh piak mi lam in a kan pial ter tawntu asiloah kan tlahchan tuk nain lungsi hngamnak a kan pe kho tung lo mi thil hna hi thlah cang hna usih. Tangka ze i zat hmanh in cawkhawh a si lo mi Pathian dawtnak, vel, zaangfahnak le thlarau ti-rawl tu hi kawl i zuam hna usih. “Ka bia ngai u law ka sin ah ra tuah u; ka sin ah ra u law nunnak nan hmuh lai,” tiah dawtnak le zaangfahnak in a khat mi Pathian nih a kan auh (Isaiah 55:3).

**Theihternak:** Hi capar 7 hna hi *Thlarau Hruaimi Hruaitu: Hruaitu Tuah Ding le Nun Tlaihtleng Pakua* cauk chung i Dal 8 nak “Pathian I Bochannak” hngatchan in tial mi an si.